



Emanuel Nûko, Naleraq  
Inatsisartuni ilaasortaq  
inatsisartut@ina.alla.gl

## **Kangiata timmisartuussiffigineqarnera pillugu § 37 naapertorlugu apeqquteqaammut 2022-089-imut akissut**

18-05-2022  
Suliap normua: 2022-10144  
ID. nr. 76218634

Asasara Emanuel

Inatsisartut suleriaasianni § 37 naapertorlugu Kangiata timmisartuussiffigineqarnera pillugu Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik.

Postboks 909  
3900 Nuuk  
Tlf.: (+299) 34 50 00  
E-mail: box909@nanoq.gl  
www.naalakkersuisut.gl

### **Apeqqut 1: Qaqugu kangiani Air Greenland-ip timmisartuutaanut sermiiameq (deicing) atulissava?**

Akissut: Kangiani sermiiameqarneq ajornartorsiutinut iluaqutaarpiassanersoq pillugu misissuisoqarnissaanik aalajangiisoqarpoq, aammalu Air Greenland Mittarfeqarfiillu suleqatigalugit aaqqiinissamut periarfissaasinnaasut sukumiisumik oqaloqatiginnissutiginiarpakka. Tassalu Kangiani maannarpiaq sermiiameq atuisoqalernissaanut inaarutaasumik aalajangiisoqanngilaq.

### **Apeqqut 2: Mittarfiit soorliit sermiiameq atortoqarpat?**

Akissut: Kalaallit Nunaanni sermiiameq Kangerlussuup, Nuup, Ilulissat, Sisimiut aamma Maniitsup mittarfiini peqarpoq. Sermiiameq qulimiguulinnut atorneqarneq ajormata nunatsinni qulimiguulinnut mittarfinni sermiiameq atortoqanngilaq. Tassalu timmisartut suluusallit kisimik sermiiameqartarput, tinginermi qullariartorminnilu ingerlalluarnissaasa qulakkeerniarlugu. Timmisartup ilaasartaatip qangattarluareernerani sukkasussissamillu naammassinnereernerani timmisartup sermiiameq timmisartup suluusaani, motorit silaannarmik milluaasuini, suluusaani paperuusaanilu sermip ilaa peertarpa.

### **Apeqqut 3: Issittormiuulluta sooq Mittarfeqarfiit Kangiani sermiiameqartinneqanngila?**

Akissut: Mittarfeqarfiit mittarfiutiminni sermiiameq neqerooruteqartanngillat, taamaattumillu Air Greenland Kangerlussuarmi, Nuummi, Ilulissani, Sisimiuni Maniitsumilu sermiiameq pigisaqarpoq. Air Greenland aamma Mittarfeqarfiit mittarfinni ataasiakkaani isumalluutit pitsaanerpaamik atuinissamik isumaqatigiissuteqarput, tamannalu pissutigalugu Mittarfeqarfiit sulisui mittarfinni taaneqartuni sermiiameqartut. Kisianni Air Greenland sermiiameq atortunut, sulisut sungiusartinneqarnerinut il.il. akisussaasuvoq. Tamatuma saniatigut apeqqut 1-imut akissut innersuussutigineqarpoq.

**Apeqquut 4: Kangiani timmisartuussineq pitsaanerusumik ingerlalernissaanut piaarnerpaamik aaqiivigineqarnissaanik Naalakkersuiut qanoq pilersaaruteqarpat?**

Akissut: Kiisalu Naalakkersuisut Kangiani timmisartut angallannerisa siunissaanut pilersaaruteqarnersut aperineqarput. Naalakkersuisut maannarpiaq Tasiilami aamma Ittoqqortoormiini mittarfissat nutaat marluk pilersaarusiornissaannut piareersaatiniq suliaqarput. Matumani Ittoqqortoormiini mittarfik pillugu § 37 naapertorlugu apeqquuteqaammut 2022-028-mut akissut innersuussutigissavara. Akissuteqaammi tassani aamma Tasiilami mittarfiliornissap pilersaarusiorneqarnera atuuttoq pineqarpoq. Inatsisartut tungaanniit mittarfiliortiternernut aningaasaliissutissanik ujartuinissamik kissaateqarpata, mittarfiit nutaat taakku Kangiani ornigassanut timmisartuussinernut sunniuteqarnissaat naatsorsuutigineqarpoq.

**Apeqquut 5: 2021-imi kangiani Air Greenland-ip timmisartuutai qasseriartutik taamaatiinnarpat?**

Akissut: Mittarfeqarfii ilisimatitsipput, 2021-mi Kulusummut taamaatitsinerit katillugit 841-iusimasut aammalu Nerlerit Inaannut taamaatitsinerit 618-iusimallutik. Kulusummut timmisartuussinerit katillugit 1433-usimapput aammalu Nerlerit Inaannut timmisartuussinerit 618-iusimallutik. Erseqqissaatigissavara 2021-mi timmisartuussinerit Covid-19 peqqutigalugu angalanernut killilersuisoqarneranik sunnerneqarsimammat, taamaattumillu timmisartuussisartunut imaluunniit Mittarfeqarfinnut ukioq ingerlatsiviusoq nalinginnaasuusimanani.

**Apeqquut 6: 2022-imi maannamut Air Greenland-ip timmisartuutai qasseriartutik taamaatiinnarpat?**

Akissut: Mittarfeqarfinniit ilisimatitsissutigineqarpoq, 2022-mi qaammatini siullerni Kulusummi taamaatitsinerit 413-iusimasut, aammalu Nerlerit Inaannut taamaatitsinerit 288-iusimallutik. Kulusummut katillugit 653-inik aamma Nerleri Inaannut 506-inik timmisartuussisoqarsimavoq.

**Apeqquut 7: Kangiani 2021-imi Air Greenland-ip innuttaasut aallanngitsoortunut unnuiffissatsinerannut nerisaqarneranullu anigaasartuutit qanoq annertutigippat?**


Akissut: Apeqquut Air Greenlandip ingerlanneqarneranut attuumassuteqarpoq, taamaattumillu Air Greenlandip apeqquutip kissaatigineqartutut sukumiisumik akisinnaanngilaa. Kisiannili Air Greenlandimit ilisimatitsissutigineqarpoq, matumani ukiumut aningaasat ikinngitsut pineqarmata.

**Apeqquut 8: 2022-mi maannamut aningaasartuutit qassit atorneqareerpat?**

Akissut: Apeqquut 7-imut akissut takuuk.

Neriuppunga qulaani allaqqasuni apeqquuteqaatitit akineqartut.

Inussiarnersumik inuulluaqqusillunga

  
Erik Jensen